



唐李杜詩集卷之四

李集

五言古詩

訓答

訓談少府

一尉居倏忽梅生有仙骨三事或可羞匈奴哂千秋壯心
屈黃綬浪跡寄滄洲昨觀荆峴作如從雲漢遊老夫當暮
矣蹠足懼驂騑

五月東魯行答汶上翁

五月梅始黃蠶凋桑柘空魯人重織作機杼鳴簾櫳顧余
不及仕學劍來山東舉鞭訪前途獲笑汶上翁下愚忽壯
士未足論窮通我以一箭書能取遼城功終然不受賞羞
與世人同西歸去直道落日昏陰虹此去爾勿言甘心如

轉蓬

答長安崔少府叔封遊終南翠微寺太宗皇帝金
沙泉見寄

河伯見海若傲然誇秋水小物昧遠圖寧知通方士多君
紫霄意獨往蒼山裏地古寒雲深崑崙高長風起初登翠微
嶺復憇金沙泉踐苔朝霜滑弄波夕月圓飲彼石下流結
羅宿溪煙鼎湖夢涿水龍駕空茫然早行子午間却登山
路遠拂琴聽霜猿滅燭乃星飯人煙無明異鳥道絕往返
攀崖倒青天視白日晚既過石門隱還唱石潭歌涉雪
塞紫芳濯纓想清波此人不可見此地君自過爲余謝風
泉其如幽意何

謝崔五郎中

朔雲橫高天萬里起秋色壯士心飛揚落日空歎息長嘯
出原野凜然寒風生幸遭聖明時功業猶未成柰何懷良
圖鬱悒獨愁坐杖策尋英豪立談乃知我崔公生民秀緬
邈青雲姿制作參造化託諷含神祇海嶽尚可傾吐諾終
不移是時霜飈寒逸興臨華池起舞拂長劍四座皆揚眉
因得窮歡情贈我以新詩又結汗漫期九垓還相待舉身
憇蓬壺濯足弄滄海從此凌倒景一去無時還朝遊明光
宮暮入閭闔關但得長把袂何必嵩丘山

以詩代書答元丹丘

青鳥海上來今朝發何處口銜雲錦字與我忽飛去鳥去
凌紫煙書留綺窓前開緘方一笑乃是故人傳故人深相
勗憶我勞心曲離居在咸陽三見秦草綠置書雙袂間引

領不慙閒長望杳難見浮雲橫遠山

金門答蘇秀才

君還石門日朱火始改木春草如有情山中尚含綠折芳
愧遙憶永路當自勗遠見故人心平生以此足巨海納百
川麟閣多才賢獻書入金闕酌醴奉瓊筵屢忝白雲唱恭
聞黃竹篇恩光煦拙薄雲漢希騰遷銘鼎儻云遂扁舟方
渺然我留金門君去卧丹壑未果三山期遙欣一丘樂
玄珠寄罔象赤水非寥廓願狎東海鷗共營西山藥栖崑
君寂滅處世余龍蠖良辰不同賞永日應閒居鳥鳴簷間
樹花落窓下書綠溪見綠篠隔岫窺紅蕖採薇行笑歌眷
我情何已月出石鏡間松鳴風琴裏得心自虛妙外物空
頽靡身世如兩忘從君老煙水

訓坊州王司馬與閻正字對雪見贈

遊子東南來自苑適京國飄然無心雲倏忽復西北訪戴
昔未偶尋嵇此相得愁顏發新歡終宴敘前識閻公漢庭
舊沉鬱富才力價重銅龍樓聲高重門側寧期此相遇華
館陪遊息積雪明遠峯寒城鎖春色主人蒼生望假我青
雲翼風水如見資投竿佐皇極

訓張卿夜宿南陵見贈

月出魯城東明如天上雪魯女驚莎鷄鳴機應秋節當君
相思夜火落金風高河漢挂戶牖欲濟無輕舸我昔辭林
丘雲龍忽相見客星動太微朝去洛陽殿爾來得茂彥七
葉仕漢餘身爲下邳客家有圮橋書傳說未夢時終當起
巖野萬古騎辰星光輝照天下與君各未遇長策委高萊

寶刀隱玉匣鏽碧澁空莓苔遂令世上愚輕我土與灰一
朝攀龍去掘鼃上音義同蛙下母取切水蟲也安在哉故山定有酒與爾
傾金壘

訓岑勲見尋就元丹丘對酒相待以詩見招

黃鶴東南來寄書寫心曲倚松開其緘憶我腸斷續不以
千里遙命駕來相招中逢元丹丘登嶺宴碧霄對酒忽思
我長嘯臨清飈寒余未相知茫茫綠雲垂俄然素書及鮮
此長渴饑策馬望山月途窮造堦墀喜茲一會面若覩瓊
樹枝憶君我遠來我歡方速至開顏酌美酒樂極忽成醉
我情既不淺君意方亦深相知兩相得一顧輕千金且向
山客笑與君論素心

答從弟幼成過西園見贈

一身自瀟灑萬物何囂喧拙薄謝明時棲閒歸故園二季
過舊壑四隣馳華軒衣劍照松宇賓徒光石門山童薦瓊
果野老開芳罇上陳樵漁事下遂農圃言昨來荷花滿今
見蘭茗繁一笑復一歌不知夕景昏醉罷同所樂此情難
具論

訓王補闕惠翼莊廟宋丞泚贈別

學道三千春自言羲和人軒蓋宛若夢雲松長相親偶將
二公合復與三山鄰喜結海上契自爲天外賓鸞翮我先
鏃所戒切龍性君莫馴朴散不向古時訛皆失真勿踏荒
溪波揭丘傑切來浩然津薜帶何辭楚桃源堪避秦世迫
且離別心在期隱淪訓贈非烟誠永言銘珮紳
訓裴侍御對雨感時見贈

雨色秋來寒風嚴清江爽孤高繡衣人瀟灑清霞賞平生
多感激忠義非外獎禍連積怨生事及徂川往楚邦有壯
士鄢郢翻掃蕩申包哭秦庭泣血將高仰鞭屍辱已及堂
上羅宿莽頗似今之人蠱賊陷忠謹渺然一水隔何由稅
歸鞅日夕聽猿愁懷賢盈夢想

翫月金陵城西孫楚酒樓達曙歌吹日晚乘醉著
紫綺裘烏紗巾與酒客數人棹歌秦淮往石頭

訪崔四侍御

昨翫西城月青天垂玉鈎朝沽金陵酒歌吹孫楚樓忽憶
繡衣人乘船往石頭草裹烏紗巾倒被紫綺裘兩岸拍手
笑疑是王子猷酒客十數公崩騰醉中流譁浪掉海客喧
呼傲陽侯半道逢吳姬卷簾出柳榆上音耶下音俞叶我

憶君到此不知狂與羞一月一見君三杯便迴橈捨舟共
連袂行上南渡橋興發歌淥水秦客爲之謳鷄鳴復相招
清宴逸雲霄贈我數百字字字凌風颺繫之衣裘上相憶
每長謔

答族姪僧中孚贈玉泉仙人掌茶并序

余聞荊州玉泉寺近清溪諸山山洞往往有乳窟窟
中多玉泉交流中有白蝙蝠大如鷄按仙經蝙蝠一
名仙鼠千歲之後體白如雪棲則倒懸蓋飲乳水而
長生也其水邊處處有茗草羅生枝葉如碧玉唯玉
泉真公常采而飲之年八十餘歲顏色如桃花而此
茗清香滑熟異於他者所以能還童振枯壯人壽也
余遊金陵見宗僧中孚示余茶數十片拳然重疊其

狀如手號為仙人掌茶蓋新出乎玉泉之山曠古未
覲因持之見遺兼贈詩要予答之遂有此作後之高
僧大隱知仙人掌茶發乎中孚禪子及青蓮居士李
白也

常聞玉泉山山洞多乳窟仙鼠如白鷗倒懸深溪月茗生
此中石玉泉流不歇根柯灑芳津採服潤肌骨叢老卷綠
葉枝枝相接連曝成仙人掌似拍洪崖肩舉世未見之其
名定誰傳宗英乃禪伯投贈有佳篇清鏡燭無鹽顧慚西
子妍朝坐有餘興長吟播諸天

謝裴侍御留岫師彈琴見寄

君同鮑明遠邀彼休上人鼓琴亂白雪秋變江上春瑤草
綠未衰攀翻寄情親相思兩不見流淚空盈巾

張相公出鎮荊州尋除太子詹事余時流夜郎行
至江夏與張相公去千里公因太府丞王昔使
車寄羅衣二事及五月五日贈余詩余答以此
詩

張衡殊不樂應有四愁詩慙君錦繡段贈我慰相思鴻鵠
復矯翼鳳凰憶故池榮樂一如此商山老紫芝

答裴侍御先行至石頭驛以書見招期月滿泛洞
庭

君至石頭驛寄書黃鶴樓開緘識遠意速此南行舟風水
無定準湍波或滯留憶昨新月生西簷若瓊鈎今來何所
似破鏡懸清秋恨不三五明平湖泛澄流此歡竟莫遂笑
殺王子猷巴陵定近遠持贈解人憂

答高山人兼呈權顧二侯

虹霓掩天光，哲后起康濟。應運生夔龍，開元掃氛翳。太微廓金鏡，端拱清遐裔。輕塵集嵩岳，虛點聖明意。謬揮紫泥詔，獻納青雲際。讒惑英主心，恩疎佞臣計。徬徨庭闕下，歎息光陰逝。未作仲宣詩，先流賈生淚。挂帆秋江上，不爲雲羅制。山海向東傾，百川無盡勢。我於鴟夷子，相去千餘歲。運濶英達稀，同風遙執袂。登艫望遠水，忽見滄浪柁。高士何處來，虛舟眇安繫。衣貌本淳古，文章多佳麗。延引故鄉人，風義未渝替。顧侯達語默，權子識通蔽。曾は無心雲，俱爲此智滯。雙萍易飄轉，獨鶴思凌厲。明晨去瀟湘，共謁蒼梧帝。

至陵陽山登天柱石，酬韓侍御見招隱黃山

韓衆騎白鹿，西往華山中。玉女千餘人，相隨在雲空。見我傳秘訣，精神與天通。何意到陵陽，遊目送飛鴻。天子昔避狄，與君亦乘騶。擁兵五陵下，長策馭胡戎。時忝解繡衣，脫身若飛蓬。鸞鳳翻羽翼，啄粟坐樊籠。海鶴一笑之，思歸向遼東。黃山過石柱，巘崿上攢叢。因巢翠玉柱，忽見浮丘公。又引王子喬，吹笙舞松風。朗詠紫霞篇，請開藥珠宮。步綱繞碧落，倚樹招青童。何日可携手，遺形入無窮。

酬崔十五見招

爾有鳥跡書，相招琴溪飲。手跡尺素中，如天落雲錦。讀罷向空笑，疑君在我前。長吟字不滅，懷袖且三年。

游宴

游南陽白水登石激作

朝涉白水源暫與人俗踈島嶼佳境色江天涵清虛目送
去海雲心閒遊川魚長歌盡落日乘月歸田廬

遊南陽清冷泉

惜彼落日暮愛此寒泉清西輝逐流水蕩漾遊子情空歌
望雲月曲盡長松聲

尋魯城北范居士失道落蒼耳中見范置酒摘蒼

耳作

鴈度秋色遠日靜無雲時客心不自得浩漫將何之忽憶
范野人閒園養幽姿茫然起逸興但恐行來遲城壕失往
路馬首迷荒陂不惜翠雲裘遂爲蒼耳欺入門且一笑把
臂君爲誰酒客愛秋蔬山盤薦霜梨他筵不下筋此席忘
朝饑酸棗垂北郭寒瓜蔓東籬還傾四五酌自詠猛虎詞

近作十日歡遠爲千載期風流自歟蕩謔浪偏相宜
上馬去却笑高陽池

秋獵孟諸夜歸置酒單父東樓觀妓

傾暉速短炬走海無停川冀餐園丘草欲以還頽年此事
不可得微生若浮煙駿發誇名駒彫弓控鳴弦鷹豪魯草
白狐兔多肥鮮邀遮相馳逐遂出城東田一掃四野空喧
呼鞍馬前歸來獻所獲炮炙宜霜天出舞兩美人飄飄若
雲仙留歡不知疲清曉方來旋

遊泰山六首

四月上泰山石屏御道開六龍過萬壑澗谷隨縈迴馬跡
遶碧峯于今滿青苔飛流灑絕巘水急松聲哀北眺崑嶂
竒傾崖向東摧洞門閉石扇地低興雲雷登高望蓬瀛想

別有千古如

子高

五七律

象金銀臺天門一長嘯萬里清風來玉女四五人飄飄下
九垓含笑引素手遺我流霞杯稽首再拜之自愧非仙才
曠然小宇宙棄世何悠哉

清曉騎白鹿直上天門山山際逢羽人方瞳好容顏捫蘿
欲就語却掩青雲關遺我鳥跡書飄然落巖間其字乃上
古讀之了不闕感此三嘆息從師方未還

平明登日觀舉手開雲關精神四飛揚如出天地間黃河
從西來窈窕入遠山憑崖攬八極目盡長空閒偶然值青
童綠髮雙雲鬢笑我晚學仙蹉跎凋朱顏躊躇忽不見浩
蕩難追攀

清齋三千日裂素寫道經吟誦有所得衆神衛我形雲行
信長風颯若羽翼生攀崖上日觀伏檻窺東溟海色動遠

山天鷄已先鳴銀臺出倒景白浪翻長鯨安得不死藥高
飛向蓬瀛

日觀東北傾兩崖夾雙石海水落眼前天光遙空碧千峯
爭攢聚萬壑絕凌歷緬彼鶴上仙去無雲中跡長松入雲
漢遠望不盈尺山花異人間五月雪中白終當遇安期於
此鍊玉液

朝飲王母池暝投天門關獨抱綠綺琴夜行青山間山明
月露白夜靜松風歇仙人遊碧峯處處笙歌發寂聽娛清
暉玉真連翠微想像鸞鳳舞飄飄龍虎衣捫天摘匏瓜恍
惚不憶歸舉手弄清淺誤攀織女機明晨坐相失但見五
雲飛

秋夜與劉碭山泛宴喜亭池

明宰試舟楫張燈宴華池文招梁苑客歌動郢中兒月色
望不盡空天交相宜令人欲泛海只待長風吹

與從姪杭州刺史良遊天竺寺

挂席凌蓬丘觀濤憇樟樓三山動逸興五馬同遨遊天竺
森在眼松風颯驚秋覽雲測變化弄水窮清幽疊嶂隔遙
海當軒寫歸流轉成傲雲月佳趣滿吳洲

同友人舟行

楚臣傷江楓謝客拾海月懷沙去瀟湘挂席泛溟渤蹇予
訪前跡獨往造窮髮古人不可攀去若浮雲沒願言弄倒
景從此鍊真骨華頂窺絕溟蓬壺望超忽不知青春度但
惟綠芳歇空持釣鰲心從此謝魏闕

下終南山過斛斯山人宿置酒

暮從碧山下山月隨人歸却顧所來徑蒼蒼橫翠微相携
及田家童稚開荆扉綠竹入幽逕青蘿拂行衣歡言得所
憩美酒聊共揮長歌吟松風曲盡河星稀我醉君復樂陶
然共忘機

朝下過盧郎中敘舊遊

君登金華省我入銀臺門幸遇聖明主俱承雲雨恩復此
休浣時閒為疇昔言却話山海事宛然林壑存明湖思曉
月疊嶂憶清猿何由返初服田野醉芳樽

邯鄲南亭觀妓

歌鼓燕趙兒魏妹弄鳴絲粉色艷日彩舞袖拂花枝把酒
顧美人請歌邯鄲詞清箏何繚繞度曲綠雲垂平原君安
在科斗生古池座客三千人于今知有誰我輩不作樂但

為後代悲

春日遊羅敷潭

行歌入谷口，路盡無人躋。攀崖度絕壑，弄水尋迴溪。雲從石上起，客到花間迷。淹留未盡興，日落群峯西。

春陪商州裴使君遊石娥溪

裴公有仙標，拔俗數千丈。澹蕩滄洲雲，飄颻紫霞想。剖竹商洛間，政成心已閒。蕭條出世表，冥寂閑玄關。我來屬芳節，解榻時相悅。褰帷對雲峯，揚袂指松雪。暫出東城邊，遂遊西巖前。橫天聳翠壁，噴壑鳴紅泉。尋幽殊未歇，愛此春光發。溪傍饒名花，石上有好月。命駕歸去來，露華生翠管。淹留惜將晚，復聽清猿哀。清猿斷人腸，遊子思故鄉。明發首東路，此懼焉可忘。

春日陪楊江寧及諸官宴北湖感古作

昔聞顏光祿，攀龍宴京湖。樓船入天鏡，帳殿開雲衢。君王歌大風，如樂豐沛都。延年獻佳作，邈與詩人俱。我來不及此，獨立鍾山孤。楊宰穆清風，芳聲騰海隅。英僚滿四座，粲若瓊林敷。鷓首弄倒景，蛾眉綴明珠。新絃採梨園，古舞嬌吳歎。曲度繞雲漢，聽者皆懽娛。鷄棲何嘈嘈，汭月沸笙竽。古之帝宮苑，今乃人樵蘇。感此勸一觴，願君覆瓢壺。榮盛當作樂，無令後賢吁。

宴鄭叅卿山池

爾恐碧草晚，我畏朱顏移。愁看楊花飛，置酒正相宜。歌聲送落日，舞影迴清池。今夕不盡杯，留歡更邀詩。

遊謝氏山亭

淪老卧江海再歡天地清病閒久寂寞歲物徒芬榮借君
西池遊聊以散我情掃雲松下去捫蘿石道行謝公池塘
上春草蠶已生花枝拂人來山鳥向我鳴田家有美酒落
日與之傾醉罷弄歸月逢欣稚子迎

同族姪評事黯遊昌禪師山池

遠公愛康樂爲我開禪關蕭然松下石何異清涼山花將
色不染水與心俱閒一坐度小劫觀空天地間

金陵鳳凰臺置酒

置酒延落景金陵鳳凰臺長波寫萬古心與雲俱開借問
往昔時鳳凰爲誰來鳳凰去已久正當今日迴明君越義
軒天老坐三台豪士無所用彈弦醉金壘東風吹出花安
可不盡杯六帝沒幽草深宮冥綠苔置酒勿復道歌鐘但

相催

秋浦清溪雪夜對酒客有唱鷓鴣者

披君貂襟褸上強古切下褸也對君白玉壺雪花酒上滅頓覺
夜寒無客有往陽至能吟山鷓鴣清風動窓竹越鳥起相
呼持此足爲樂何煩笙與箏

與周剛清溪玉鏡潭宴別

康樂上官去永嘉遊石門江亭有孤嶼千載跡猶存我來
憇秋浦三入桃陂源千峯照積雪萬壑盡啼猿與與謝公
合文因周子論掃屋去落葉席月開清樽溪當大樓南溪
水正南奔迴作玉鏡潭澄明洗心竟此中得佳境可以絕
囂喧清夜方歸來酣歌出平原別後經此地爲余謝蘭蓀
遊秋浦白筇陂

卷之四

卷之四

白筇夜長嘯爽然溪谷寒魚龍動陂水處處生波瀾天借
一明月飛來碧雲端故鄉不可見腸斷正西看

泛沔州城南郎官湖 并序

乾元歲秋八月白遷於夜郎遇故人尚書郎張謂出
使夏口沔州牧杜公漢陽宰王公觴於江城之南湖
樂天下之再平也方夜水月如練清光可掇張公殊
有勝槩四望超然乃顧白曰此湖古來賢豪遊者非
一而枉踐佳景寂寥無聞夫子可為我標之嘉名以
傳不朽白因舉酒酹水號之曰郎官湖亦猶鄭圃之
有僕射陂也席上文士輔翼岑靜以為知言乃命賦
詩紀事刻石湖側將與大別山共相磨滅焉

張公多逸興共泛沔城隅當時秋月好不減武昌都四座

醉清光為歡古來無郎官愛此水因號郎官湖風流若未
減名與此山俱

夜汎洞庭尋裴侍御清酌

日晚湘水綠孤舟無端倪明湖漲秋月獨泛巴陵西遇憇
裴逸人巖居陵丹梯抱琴出深竹為我彈鷓鴣曲盡酒亦
傾北窓醉如泥人生且行樂何必組與珪

與南陵常贊府遊五松山

安石汎溟渤獨嘯長風還逸韻動海上高情出人間靈異
可並跡澹然與世間我來五松下置酒窮躋攀徵古絕遺
老因名五松山五松何清幽勝境美沃洲蕭颯鳴洞壑終
年風雨秋響入百泉去聽如三峽流剪竹掃天花且從微
吏遊龍堂若可憇吾欲歸精修

宣城青溪

青溪勝桐廬。水木有佳色。山貌日高古。石容天傾側。綵鳥昔未名。白猿初相識。不見同懷人。對之空嘆息。

遊水西簡鄭明府

天宮水西寺。雲錦照東郭。清湍鳴迴溪。綠水繞飛閣。涼風日瀟灑。幽客時憇泊。五月思貂裘。謂言秋霜落。石蘿引古蔓。岸筍開新籜。吟翫空復情。相思爾佳作。鄭公詩人秀。逸韻宏寥廓。何當一來遊。愜我雪山諾。

九日登山

淵明歸去來。不與世相逐。為無杯中物。遂偶本州牧。因招白衣人。笑酌黃花菊。我來不得意。虛過重陽時。題輿何俊發。遂結城南期。築土按響山。俯臨遠水湄。胡人叫玉笛。越

女彈霜絲。自作英王胄。斯樂不可窺。赤鯉湧琴高。白龜道冰夷。靈仙如彷彿。真醑遙相知。古來登高人。今復幾人在。滄洲違宿諾。明日猶可待。連山似驚波。合沓出溟海。揚袂揮四座。酪酏安所知。齊歌送清揚。起舞亂參差。賓隨落葉散。帽逐秋風吹。別後登此臺。願言長相思。

九日

今日雲景好。水綠秋山明。携壺酌流霞。舉菊汎寒榮。地遠松石古。風揚弦管清。窺觴照歡顏。獨笑還自傾。落帽醉山月。空歌懷友生。

陪族叔當塗宰遊化城寺升公清風亭

化城若化出。金榜天宮開。疑是海上雲。飛空結樓臺。升公湖上秀。粲然有辯才。濟人不利己。立俗無嫌猜。了見水中

月青蓮出塵埃間居清風亭左右清風來當暑陰廣殿太
陽爲徘徊茗酌待幽客玳盤薦彫梅飛文何灑落萬象爲
之摧李父擁鳴琴德聲布雲雷雖遊道林室亦舉陶潛杯
清樂動諸天長松自吟哀留歡若可盡劫石乃成灰

登覽

登錦城散花樓

日照錦城頭朝光散花樓金窓夾繡戶珠箔懸銀鈎飛梯
綠雲中極目散我憂暮雨向三峽春江繞雙流今來一登
望如上九天遊

登峨眉山

蜀國多仙山峨眉邈難匹周流試登覽絕恠安可息青冥
倚天闕彩錯疑畫出冷然紫霞賞果得錦囊術雲間吟瓊

簫石上弄寶瑟平生有微尚歡笑自此畢煙容如在顏塵
累忽相失倘逢騎羊子携手凌白日

大庭庫

朝登大庭庫雲物何蒼然莫辨陳鄭火空羶鄒魯煙我來
尋梓慎觀化入寥天古木朔氣多松風如五弦帝圖終其
沒歎息滿山川

登單父陶少府半月臺

陶公有逸興不與常人俱築臺像半月迴向高城隅置酒
望白雲商飈起寒梧秋山入遠海桑柘羅平蕪水色綠且
明令人思鏡湖終當過江去愛此暫踟躕

天台曉星

天台鄰四明華頂高百越門標赤城霞樓棲滄島月憑高

登遠覽直下見溟渤雲垂大鵬翻波動巨鯨沒風潮爭洶湧神恠何翕忽觀竒跡無倪好道心不歇攀條摘朱實服藥鍊金骨安得生羽毛千春卧蓬闕

焦山望松寥山

石壁望松寥宛然在碧霄安得五綵虹架天作長橋山人如愛我舉手來相招

登太白峯

神耶化耶
西上太白峯夕陽窮登攀太白與我語爲我開天關願乘冷風去直出浮雲間舉手可近月前行若無山一別武功去何時復更還

登邯鄲洪波臺置酒觀發兵

我把兩赤羽來遊燕趙間天狼正可射感激無時閑觀兵

洪波臺倚劍望玉關請纓不繫越且向燕然山風引龍虎旗歌鐘皆追攀擊筑落高月投壺破愁顏遙知百戰勝定掃鬼方還

登廣武古戰場懷古

秦鹿奔野草逐之若飛蓬項王氣盖世紫電明雙瞳呼吸八千人橫行起江東赤精斬白帝叱咤入關中兩龍不並躍五緯與天同楚滅無英圖漢興有成功按劍清八極歸酣歌大風伊昔臨廣武連兵決雌雄分我一杯羹太皇乃汝翁戰爭有古跡壁壘頽層穹猛虎吟澗壑饑鷹鳴秋空翔雲列曉陣殺氣赫長虹撥亂屬豪聖俗儒安可通沉酒呼豎子狂言非至公撫掌黃河曲嗤嗤阮嗣宗

登金陵冶城西北謝安墩

晉室昔橫潰永嘉逐南奔沙塵何茫茫龍虎鬪朝昏胡馬
風漢草天驕盛中原哲匠感頽運雲鵬忽飛翻組練照楚
國旌旗連海門西秦百萬衆戈甲如雲屯投鞭可填江一
掃不足論皇運有返正醜虜無遺魂談笑遏橫沅蒼生望
斯存冶城訪古跡一作至今城隅猶有謝安墩憑覽周地險高
標絕人喧想像東山姿緬懷右軍言梧桐識嘉樹蕙草留
芳根白鷺映春洲青龍見朝暎地古雲物在臺傾禾黍繁
我來酌清波於此樹名園功成拂衣去歸入武陵源

登瓦官閣

晨登瓦官閣極眺金陵城鍾山對北戶淮水入南榮漫漫
雨花落嘈嘈天樂鳴兩廊振法鼓四角吟風箏杳出霄漢
上仰攀日月行山空霸氣滅地古寒陰生寥廓雲海晚蒼

茫宮觀平門餘閭闔字樓識鳳凰名雷作百山動神扶萬
拱傾靈光何足貴長此鎮吳京

登梅岡望金陵贈族姪高座寺僧中孚

鍾山抱金陵霸氣昔騰發天開帝王居海色照宮闕群峯
如逐鹿奔走相馳突江水九道來雲端遙明沒時遷大運
去龍虎勢休歇我來屬天清登覽窮楚越吾宗挺禪伯特
秀鸞鳳骨衆星羅青天明者獨有月冥居順生理草木不
剪伐煙窓引薔薇石壁老野蕨吳風謝安屐白足傲履屨
幾宿一下山蕭然忘干謁談經演金偈降鶴舞海雲時聞
天香來了與世事絕佳遊不可得春去惜遠別賦詩留嘉
屏千載庶不滅

望廬山瀑布水

西登香鑪峯南見瀑布水挂流三百丈噴壑數十里歛如
飛電來隱若白虹起初驚河漢落半灑雲天裡仰觀勢轉
雄壯哉造化功海風吹不斷江月照還空空空中亂浪射左
右洗青壁飛珠散輕霞流沫沸穿石而我遊名山對之心
益閒無論嗽瓊液且得洗塵顏仍諧宿所好永願辭人間

江上望皖公山

奇峯出奇雲秀木含秀氣青冥皖公山巉絕稱人意
獨遊滄江上終日淡無味但愛茲嶺高何由討靈異默然
遙相許欲往心莫遂待吾還丹成投跡歸此地

望南鶴樓

東望黃鶴山雄雄半空出四面生白雪中峯倚紅日巖巒
行穹跨峯嶂亦冥密頗聞列仙人於此學飛術一朝向蓬

海千載空石室金竈生煙埃玉潭秘清謚音密無聲也地古無
草木庭寒老芝朮蹇余羨攀躋因欲保閒逸觀奇徧諸嶽
茲嶺不可匹結心寄青岱永悟客情畢

九日登巴陵置酒望洞庭水軍

九日天氣清登高無秋雲造化闢川嶽了然楚漢分長風
鼓橫波合沓感龍文憶昔傳遊豫樓船壯橫汾今茲討鯨
鯢旌旆何繽紛白羽落酒樽洞庭羅三軍黃花不掇手戰
鼓遙相聞劍舞轉頽陽當時日停曛酣歌激壯士可以推
妖氛齷齪東籬下淵明不足群

秋登巴陵望洞庭

清晨登巴陵周覽無不極明湖映天光徹底見秋色秋色
何蒼然際海俱澄鮮山青滅遠樹水綠無寒煙來帆出江

歡樂極了哀
情多人心其

中。去。鳥。向。日。邊。風。清。長。沙。浦。霜。空。雲。夢。田。瞻。光。惜。顏。髮。關
水。悲。徂。年。北。渚。既。蕩。漾。東。流。自。潺。湲。郢。人。唱。白。雪。越。女。歌
採。蓮。聽。此。更。勝。斷。憑。崖。淚。如。泉。

登巴陵開元寺西閣贈衡嶽僧方外

衡嶽有闡音歲也士五峯秀真骨見君萬里心海水照秋月
大臣南溟去問道皆請謁酒以甘露言清涼潤肌髮明湖
落天鏡香閣凌銀闕登眺食惠風新花期啓發

登敬亭北二小山余時客逢崔御史並登此地

送客謝亭北逢君縱酒還屈盤戲白馬大笑上青山迴鞭
指長安西日落秦關帝鄉三千里杳在碧雲間

金陵望漢江

漢江迴萬里派作九龍盤橫潰豁中國崔嵬飛迅湍六帝

倫亡後三吳不足觀我君混區宇垂拱衆流安今日任公
子滄浪罷釣竿

行役

安州應城玉女湯作

神女歿幽境湯池流大川陰陽結炎炭造化開靈泉地底
爍朱火沙傍歆素煙沸珠躍晴月皎鏡涵空天氣浮蘭芳
滿色漲桃李然精覽萬殊入潛行七澤連愈疾功莫尚變
盈道乃全濯濯氣清泚晞髮弄潺湲散下楚王國分澆宋
玉田可以奉巡幸柰何隔窮偏獨隨朝宗水赴海輸微涓

之廣陵宿常二南顧北宮

綠水接柴門有如桃李源忘憂或假草蒲院羅叢萱暝色
湖上來微雨飛南軒故人宿茅宇夕鳥歸楊園還惜詩酒

別深爲江海言明朝廣陵道獨憶此傾樽

郢門秋懷

郢門一爲客巴月三成弦朔風正搖落行子愁歸旋杳杳
山外日茫茫江上天人迷洞庭水鴈度瀟湘煙清曠諧宿
好碯磷及此年百齡何蕩漾萬化相推遷空謁蒼梧帝徒
尋溟海仙已聞蓬岳淺豈見三桃園倚劍增浩歎捫襟還
自憐終當遊五湖濯足滄浪泉

荆門浮舟望蜀江

春水月峽來浮舟望安極正見桃花流依然錦江色江色
綠且明茫茫與天平逶迤巴山盡搖曳楚雲行雪照聚沙
鴈花飛出谷鶯芳州却已轉碧樹森森迎流目浦煙夕揚
帆海月生江陵識遙火應到渚官城

上三峽

巫山夾青天巴水流若茲巴水忽可盡青天無到時三朝
上黃牛三暮行太遲三朝又三暮不覺鬢成絲

自巴東舟行經瞿唐峽登巫山最高峯晚還題壁
江行幾千里海月十五圓始經瞿唐峽遂步巫山巔巫山
高不窮巴國盡所歷印邊攀垂蘿霞外倚穹石飛步凌絕
頂極目無纖煙却顧失丹壑仰觀臨青天青天若可捫銀
漢去安在望雲如蒼梧記水辯瀛海周遊孤光晚歷覽幽
意多積雪照空谷悲風鳴森柯歸途行欲曛佳趣尚未歇
江草早啼猿松頭已吐月月色何悠悠清猿響啾啾辭山
不忍聽揮策還孤舟

奔亡道中

蘇蘇望湖水青青蘆葉齊歸心落何處日沒大江西歇馬
傍春草欲行遠道迷誰忍子規鳥連聲向我啼

江行寄遠

剗木出吳楚危槎百餘尺疾風吹片帆日暮千里隔別時
酒猶在已爲異鄉客思君不可得愁見江水碧

下涇縣陵陽溪至澁灘

澁灘鳴嘈嘈兩山足猿猱白波若捲雪側石不容舸漁人
與舟人撐折萬張篙

下陵陽公高溪三門六刺灘

三門橫峻灘六刺走波瀾石驚虎伏起水狀龍縈盤何慚
七里瀨使我欲垂竿

宿鰕湖

鷄鳴發黃山暝投鰕湖宿白雲映寒山森森似銀竹提携
採鉛客結荷水邊沐半夜四天開星河爛人目明晨大樓
去崗隴多屈伏當與持斧翁前溪伐雲木

懷古

西施

西施越溪女出自苧羅山秀色掩今古荷花羞玉顏浣紗
弄碧水自與清波閑皓齒信難開沉吟碧雲間勾踐微絕
艷揚蛾入吳關提携館娃宮杳渺詎可攀一破夫差國千
秋竟不還

王右軍

右軍本清真瀟灑在風塵山陰遇羽客要此好鵝賓掃素
寫道經筆精妙入神書罷籠鵝去何魯別主人

上元夫人

上元誰夫人。偏得王母嬌。嵯峨三角髻。餘髮散垂腰。袿披青毛錦。身著赤霜袍。手提羸兒女。閒與鳳吹簫。眉語兩自笑。忽然隨風飄。

商山四皓

白髮四老人。昂藏南山側。偃卧松雪間。冥翳不可識。雪窓拂青靄。石壁橫翠色。龍虎方戰爭。於焉自休息。秦人失金鏡。漢祖升紫極。陰虹濁太陽。前星遂淪匿。一行佐明聖。歛起生羽翼。功成身不居。舒卷在胸臆。窅冥合元化。茫昧信難測。飛聲塞天衢。萬古仰遺跡。

峴山懷古

訪古登峴首。憑高眺襄中天。清遠峯出水。落寒沙。空弄珠

見遊女醉酒懷山公感歎發秋興長松鳴夜風

蘇武

蘇武在匈奴十年持漢節白鴈上林飛空傳一書札牧羊邊地苦落日歸心絕渴飲月窟水飢食天上雪東還沙漠遠北愴河梁別泣把李陵衣相看淚成血

經下邳圯橋懷張子房

子房未虎嘯破產不為家滄海得壯士推秦博浪沙報讐雖不成天地皆振動潛匿遊下邳豈曰非智勇我來圯橋上懷古欽英風唯見碧流水曾無黃石公歎息此人去蕭條徐泗空

秋夜板橋浦汎月獨酌懷謝眺

天上何所有迢迢白玉繩斜低建章闕耿耿對金陵漢水

舊如練霜江夜清澄長川瀉落月洲渚曉寒凝獨酌板橋
浦古人誰可徵玄暉難再得灑酒淚填膺

過彭蠡湖

謝公入彭蠡因此遊松門余方窺石鏡兼得窮江源前賞
迹可見後來道空存而欲繼風雅豈唯清心竟雲海方助
興波濤何足論青嶂憶遙月綠蘿鳴愁猿水碧或可採金
膏秘莫言余將振衣去羽化出囂煩

入彭蠡經松門觀石鏡緬懷謝康樂題詩書遊覽

之志 二篇或同或異故並錄之

謝公之彭蠡因此遊松門余方窺石鏡兼得窮江源將欲
繼風雅豈徒清心竟前賞逾所見後來道空存况屬臨汎
美而無洲渚喧漾水向東去漳流直南奔空濛三川夕回

合千里昏青桂隱遙月綠楓鳴愁猿水碧或可採金精秘
莫論吾將學仙去冀與琴高言

望鸚鵡洲悲禰衡

魏帝營八極蟻觀一禰衡黃祖斗筭人殺之受惡名吳江
賦鸚鵡落筆超群英鏘鏘振金玉句句欲飛鳴鷺鷥啄孤
鳳干春傷我情五獄起方寸隱然詎可平才高竟何施寡
識冒大刑至今芳洲上蘭蕙不忍生

金陵白楊十字巷

白楊十字巷北來湖溝道不見吳時人空生唐年草天地
有反覆宮城盡傾倒六帝餘古丘樵蘇泣遺老

紀南陵題五松山

聖達有去就潛光愚其德魚與龍同池龍去魚不測當時

板築輩豈知傳說情一朝和殷人光氣爲列星伊尹生空
桑指庖佐皇極桐宮放太甲攝政無愧色三年帝道明委
質終輔翼曠哉至人心萬古可爲則時命成大謬仲尼將
柰何鸞鳳忽覆巢麒麟不來過龜山蔽魯國有斧且無柯
歸來歸去來宵濟越洪波

宿巫山

昨夜巫山下猿聲夢裏長桃花飛綠水玉月下瞿塘雨色
風吹去南行拂楚王高丘懷宋玉訪古一霑裳

夜泊牛渚懷古

牛渚西江夜青天無片雲登舟望秋月空憶謝將軍余亦
能高詠斯人不可聞明朝洞庭去楓葉落紛紛

姑蘇十詠

姑蘇溪

愛此溪水間乘流興無極漾楫怕鷗驚垂竿待魚食波翻
曉霞影岸疊春山色何處浣紗人紅顏未相識

丹陽湖

湖與元氣連風波浩難止天外賈客歸雲間片帆起龜遊
蓮葉上鳥宿蘆花裡少女棹片舟歌聲逐流水

謝公宅

青山日將暝寂寞謝公宅竹重無人聲池中虛月白荒庭
衰草徧廢井蒼苔積唯有清風閒時時起泉石

陵歎臺

曠望登古臺臺高極人目疊嶂列遠空雜花間平陸間雲
入窓牖野翠生松竹欲覽碑上文苔侵豈堪讀

桓公井

桓公名已古廢井未曾竭石鑿冷蒼苔寒泉湛孤月秋來
桐暫落春至桃還發路遠人罕窺誰能見清徹

慈姥竹

野竹攢石生含煙映江島翠色落波深虛聲帶寒早龍吟
曾未聽鳳曲吹應好不學蒲柳凋貞心常自保

望夫山

顛望臨碧空愁情感離別江草不知愁常花但爭發雲山
萬重隔音信千里絕春去秋徼來相思幾時歇

牛渚磯

絕壁臨巨川連峯勢相向亂石流湍間迴波自成浪但驚
群木秀莫測精靈狀更聽猿夜啼憂心醉江上

靈墟山

丁令辭人去拂衣向仙路伏鍊九丹成方隨五雲去松蘿
蔽幽洞桃杏深隱處不知曾化鶴遼海歸幾度

天門山

迴出江上山雙峯自相對岸映松色寒石分浪花碎參差
遠天際縹緲晴霞外落日舟去遙迴首沉青靄

唐李杜詩集卷之四

李集

唐李杜詩集卷之五

李集

五言古詩

閒適

與元丹丘方城寺談玄作

茫茫大夢中唯我獨先覺騰轉風火來假合作容貌滅除
昏疑盡領畧入精要澄慮觀此身因得通寂照朗悟前後
際始知金仙妙幸逢禪居人酌玉坐相召彼我俱若喪雲
山豈殊調清風生虛空明月見談笑怡然青蓮宮永願恣
遊眺

尋高鳳石門山中元丹丘

尋幽無前期乘興不覺遠蒼崖渺難涉白日忽欲晚未窮
三四山已歷千萬轉寂寂聞猿愁行行見雲收高松來好

月空谷宜清。秋溪深古。雪在石斷。寒泉流峯巒。秀中天。登眺不可盡。丹丘遙相呼。顧我忽而哂。遂造幽谷間。始知靜者閒。留懽達永夜。清曉方言還。

安州般若寺水閣納涼喜遇薛員外又

翛然金園賞。遠近含晴光。樓臺成海氣。草木皆天香。忽逢青雲士。共解丹霞裳。水退池上熱。風生松下涼。吞討破萬象。褰窺臨衆芳。而我遺有漏。與君用無方。心垢都未滅。永言題禪房。

對酒醉題屈突明府廳

陶令八十日。長歌歸去來。故人建昌宰。借問幾時迴。風落吳江雪。紛紛入酒杯。山翁今已醉。舞袖爲君開。

月下獨酌四首

花間一壺酒。獨酌無相親。舉杯邀明月。對影成三人。月既不解飲。影徒隨我身。暫伴月將影。行樂須及春。我歌月徘徊。我舞影凌亂。醒時同交歡。醉後各分散。永結無情遊。相期邈雲漢。

天若不愛酒。酒星不在天地。若不愛酒地。應無酒泉天地。既愛酒。愛酒不愧天。已聞清比聖。復道濁如賢。賢聖既已飲。何必求神仙。三盃通大道。一斗合自然。但得醉中趣。勿爲醒者傳。

三月咸陽城千花晝如錦

一作好鳥吟清風落花散如錦又作園鳥語成歌庭花笑如錦

誰能春獨愁。對此徑須飲。窮通與修短。造化夙所稟。一樽齊死生。萬事固當審。醉後失天地。兀然就孤枕。不知有吾身。此樂最爲甚。

窮愁千萬端美酒三百杯愁多酒雖少酒傾愁不來所以
知酒聖酒酣心自開辭粟卧首陽屢空飢顏回當代不樂
飲虛名安用哉蟹螯即金液糟丘是蓬萊且須飲美酒乘
月醉高臺

春歸終南山松龍舊隱

我來南山陽事事不異昔却尋溪中水還望崑下石薔薇
緣東窓女蘿繞北壁別來能幾日草木長數尺且復命酒
樽獨酌陶永夕

冬夜醉宿龍門覺起言志

醉來脫寶劍旅憇高堂眠中夜忽驚覺起立明鏡前開軒
聊直望曉雪河冰壯哀哀歌苦寒鬱鬱獨惆悵傳說版築
臣李斯鷹犬人歛起匡社稷寧復長艱辛而我胡爲者歎
息龍門下富貴未可期殷憂向誰寫去去淚滿襟舉聲梁
甫吟青雲當自致何必求知音

尋山僧不遇作

石徑入丹壑松門閉青苔間皆有鳥跡禪室無人開窺窓
見白拂挂壁生塵埃使我空歎息欲去仍徘徊香雲徧山
起花雨後天來已有空樂好况聞清猿哀了然絕世事此
地方悠哉

過汪氏別業二首

遊山誰可遊子明與浮丘壘嶺礙河漢連峯橫斗牛汪生
面北阜池館清且幽我來感意氣搥魚列珍羞掃石待歸
月開池漲寒流酒酣益爽氣爲樂不知秋
疇昔未識君知君好賢才隨山起館宇鑿石營池臺大火

五月中景風從南來數枝石榴發一丈荷花開恨不當此時相過醉金壘我行值木落月苦清猿哀永夜達五更吳歛送瓊杯酒酣欲起舞四座歌相催日出遠海明軒車且徘徊更遊龍潭去枕石拂莓苔

待酒不至

玉壺繫青絲沽酒來何遲山花向我笑正好銜盃時晚酌東窓下流鶯復在茲春風與醉客今日且相宜

獨酌

春草如有意羅生玉堂陰東風吹愁來白髮坐相侵獨酌勸孤影閒歌面芳林長松爾何知蕭瑟為誰吟手舞石上月膝橫花間琴過此一壺外悠悠非我心一本云春草遍音落日不盡歡恐為愁所侵獨酌勸孤影閑歌面芳林清風尋空來碧松與共吟餘同上

友人會宿

滌蕩千古愁留連百壺飲良宵且清談皓月未能寢醉來卧空山天地即衾枕

春日獨酌二首

東風扇淑氣水木榮春暉白日照綠草落花散且飛孤雲還空山衆鳥各已歸彼物皆有託吾生獨無依對此石上月長醉歌芳菲

我有紫霞想緬懷滄洲間思對一壺酒淡然萬事閒橫琴倚高松把酒望遠山長空去鳥沒落日孤雲還但悲光景晚宿昔成秋顏

金陵江上遇蓬池隱者

時於落星石上以紫紉裘換酒為懽

心愛名山遊身隨名山遠羅浮麻姑臺此去或未返遇君

蓬池隱就我石上飯空言不成
懽強笑惜日晚綠水向鴈
關黃雲蔽龍山歎息兩客鳥
徘徊吳越間共語一執手留
連夜將久解我紫綺裘且換
金陵酒酒來笑復歌興酣樂
事多水影弄月色清光柰愁
何明晨挂帆席離恨滿滄波

月夜聽盧子順彈琴

閒夜坐明月幽人彈素琴
忽聞悲風調宛若寒松吟
白雪亂纖手綠水清虛心
鍾期久已歿世上無知音

日夕山中忽然有懷

久卧名山雲遂為名山客
山深雲更好賞弄終日夕
月銜樓閣峯泉漱階下石
素心自此得真趣非外惜
颺啼桂芳秋風滅籟歸寂
緬思洪崖術欲往滄海隔
雲車來何遲撫已空歎息

廬山東林寺夜懷

我尋青蓮宅獨往謝城闕
霜清東林鐘水白虎溪月
天香生虛空天樂鳴不歇
宴坐寂不動大千入毫髮
湛然冥真心曠劫斷出沒

春日醉起言志

處世若大夢胡為勞其生
所以終日醉頽然卧前楹
覺來眴庭前一鳥花間鳴
借問此何時春風語流鶯
感之欲歎息對酒還自傾
浩歌待明月曲盡已忘情

對酒

勸君莫拒盃春風笑人來
桃李如舊識傾花向我開
流鶯啼碧樹明月窺金罍
昨來朱顏子今日白髮催
棘生石虎殿鹿走姑蘇臺
自古帝王宅城闕閉黃埃
君若不飲酒昔

日安在哉

嘲王歷陽不肯飲酒

地白風色寒雪片大如手笑殺陶淵明不飲杯中酒浪撫
一張琴虛栽五株柳空負頭上巾吾與爾何有

懷思

憶崔郎中宗之遊南陽遺吾孔子琴撫之潛然感

舊

昔在南陽城唯食獨山蕨憶與崔宗之白水弄素月時過
菊潭上縱酒無休歇泛此黃金花頽然清歌發一朝摧玉
樹生死殊飄忽留我孔子琴琴存人已歿誰傳廣陵散但
哭邛山骨泉戶何時明長掃狐兔窟

望月有懷

清泉映疎松不知幾千古寒月搖輕波流光入窓戶對此
空長吟思君意何深無因見安道興盡愁人心

春滯沅湘有懷山中

沅湘春色還風暖煙草綠古之傷心人於此腸斷續予非
懷沙客但美採菱曲所願歸東山寸心於此足

落日憶山中

雨後煙景綠晴天散餘霞東風隨春歸發我枝上花花落
時欲暮見此令人嗟願遊名山去學道飛丹砂

憶秋浦桃花舊遊時竄夜郎

桃花春水生白石今出沒搖蕩女蘿枝半挂青天月不知
舊行徑初拳幾枝蕨三載夜郎還於茲煉金骨

對酒憶賀監二首

并序

太子賓客賀公於長安紫極宮一見余呼余為謫仙人因解金龜換酒為樂沒後對酒悵然有懷而作是

詩

四明有狂客風流賀季真長安一相見呼我謫仙人昔好
盃中物今為松下塵金龜換酒處却憶淚沾巾
狂客歸四明山陰道士迎勅賜鏡湖水為君臺沼榮人亡
餘故宅空有荷花生念此杳如夢凄然傷我情

感遇

越中秋懷

越水繞碧山周迴數千里乃是天鏡中分明盡相似首一本
句云蹈海思仲連遊山慕康樂
攀雲窮千峯弄水涉萬壑下同愛此從真搜永懷臨湍遊
一為滄波客十見紅蕖音渠荷秋觀濤壯天險望海令人

愁路遐迤西照歲晚悲東流何必探禹穴誓將歸蓬丘不
然五湖上亦可乘扁舟

效古二首

自古有秀色西施與東隣娥眉不可妬况乃效其顰所以
尹婕妤羞見邢夫人低頭不出氣塞默少精神寄語無塩
子如君何足珍

朝入天苑中謁帝蓬萊宮青山映輦道碧樹遶煙空謬題
金閨籍得與銀臺通待詔奉明主抽毫誦清風歸時落日
晚躑躅浮雲聽人馬本無意飛馳自豪雄入門紫鴛鴦金
井雙梧桐清歌絃古曲美酒沽新豐快意且為樂列筵坐
群公光景不可留生世如轉蓬早達勝晚遇羞比垂釣翁

擬古十二首

青天何歷歷明星白如石黃姑與織女相去不盈尺銀河
無鵲橋非時將安適閨人理紈素遊子悲行役瓶冰知冬
寒霜露欺遠客客似秋葉飛飄颻不言歸別後羅帶長愁
寬去時衣乘月託宵夢因之寄金徽
高樓入青天下有白玉堂明月看欲墮當窓懸清光遙夜
一美人羅衣沾秋霜含情弄柔瑟彈作陌上桑絃聲何激
烈風卷繞飛梁行人皆躑躅棲鳥去回翔但寫妾意苦莫
辭此曲傷願逢同心者飛作紫鴛鴦
長繩難繫日自古共悲辛黃金高北斗不惜買陽春石火
無留光還如世中人即事已如夢後來我誰身提壺莫辭
貧取酒會四隣仙人殊恍惚未若醉中真
清都綠玉樹灼爍瑤臺春攀花弄秀色遠贈天仙人香風

送紫藥直到扶桑津取掇世上艷所貴心之珍相思傳一
笑聊欲示情親

今日風日好明日恐不如春風笑於人何乃愁自居吹簫
舞彩鳳酌醴鱸神魚千金買一醉取樂不求餘達士遺天
地東門有二疎愚夫同瓦石有才知卷舒無事坐悲苦塊
然涸轍魚

運速天地閉胡風結飛霜百草死冬月六龍頽西荒太白
出東方彗星揚精光鴛鴦非越鳥何爲眷南翔惟昔鷹將
犬今爲侯與王得水成蛟龍爭池奪鳳凰北斗不酌酒南
箕空簸揚

世路今太行迴車竟何託萬族皆凋枯遂無少可樂曠野
多白骨幽菟共銷鑠榮貴當及時春華宜照灼人非崑山

玉安得長取畏切。玉光也。錯身沒期不朽。榮名在麟閣。

月色不可掃。客愁不可道。玉露生秋衣。流螢飛百草。日月

終銷毀。天地同枯槁。蟪蛄啼青松。安見此樹老。金丹寧誤

俗。昧者難精計。爾非千歲翁。多恨此世早。飲酒入玉壺。藏

身以為寶。

生者為過客。死者為歸人。天地一逆旅。同悲萬古塵。月兔

空搗藥。扶桑已成薪。白骨寂無言。青松豈知春。前後更歎

息。浮榮何足珍。

仙人騎彩鳳。昨下閩風岑。海水三清淺。桃源一見尋。遺我

綠玉盃。兼之紫瓊琴。杯以傾美酒。琴以閑素心。一物非世

有何論。珠與金。琴彈松裏風。盃勸天上月。風月長相知。世

人何倏忽。

涉江弄秋水。愛此荷花鮮。攀花弄其珠。蕩漾不成圓。佳期

彩雲重欲贈。隔遠天相思。無由見。悵望涼風前。

去去復去去。辭君還憶君。漢水既殊流。楚山亦此分。人生

難稱意。豈得長為群。越燕喜海日。燕鴻思朔雲。別久容華

晚。琅玕不能飯。日落知天昏。夢長覺道遠。望夫登高山。化

石竟不返。

感興八首

瑤姬天帝女。精彩化朝雲。宛轉入夢宵。無心向楚君。錦衾

抱秋月。綺席空蘭芬。茫昧竟誰測。虛傳宋玉文。

洛浦有宓妃。必音服必。飄颻雪爭飛。輕雲拂素月。了可見

清輝。解珮欲西走。含情詎相違。香塵動羅襪。綠水不沾衣。

陳王徒作賦。神女豈同歸。好色傷大雅。多為世所譏。

裂素持作書將寄萬里懷眷眷待遠信竟歲無人來征鴻
務從陽又不爲我棲委之在深篋塵魚壞其題何如投水
中流落他人開不惜他人開但恐生是非

芙蓉嬌綠波桃李誇白日偶蒙春風榮生此艷陽質豈無
佳人色但恐花不實宛轉龍火飛零落互相失詎知凌寒
松千載長守一首

十五遊神仙仙遊未曾歇吹笙吟松風汎瑟窺海月西山
玉童子使我鍊金骨欲逐黃鶴飛相呼向蓬闕
西國有美女結樓青雲端蛾眉艷曉月一笑傾城懽高節
奪明主烟心如凝丹常恐彩色晚不爲人所觀安得配君
子共成雙飛鸞
胡來荆山客誰爲珉玉分良寶絕見棄虛持三獻君直木

忘先伐芬蘭哀自焚盈滿天所損沉冥道所群東海有碧
水西山多白雲魯連及夷齊可以躡清芬

嘉穀隱豐草草深苗且稀農夫旣不異孤穗將安歸常恐
委疇隴忽與秋蓬飛烏得薦宗廟爲君生光輝

寓言三首

周公負斧戾成王何變變武王昔不豫剪爪投河湄賢聖
遇讒慝不免人君疑天風拔大木禾黍咸傷萎管蔡扇蒼
蠅公賦鴟鴞詩金滕若不啓忠信誰明之

搖喬雙彩鳳婉孌三青禽往還瑤臺裏鳴舞玉山岑以歡
秦娥意復得王母心區區精衛鳥銜木空哀吟

長安春色歸先入青門道綠楊不自持從風欲傾倒海燕
還秦宮雙飛入簾櫳相思不相見託夢遼城東

秋夕旅懷

涼風度秋海吹我鄉思飛連山去無際流水何時歸日夕
浮雲色心斷明月輝芳草歇柔艷白露催寒衣夢長銀漢
落覺罷天星稀含悲想舊國泣下誰能揮

感遇四首

吾愛王子晉得道伊洛濱金骨既不毀玉顏長自春可憐
浮丘公荷靡與情親舉手白日間分明謝時人二仙去已
遠夢想空殷勤

可歎東籬菊莖踈葉且微雖言異蘭蕙亦自有芳菲未泛
盈樽酒徒沾清露輝當榮君不採飄落欲何依
昔余聞嫦娥竊藥駐雲髮不自嬌玉顏方希鍊金骨飛去
身莫返含笑坐明月紫宮誇蛾眉隨手會凋歇

宋玉事楚王立身本高潔巫山賦彩雲郢路歌白雪舉國
莫能和巴人皆卷舌一惑登徒言恩情遂中絕

寫懷

翰林讀書言懷呈集賢內諸學士

晨趨紫禁中夕待金門詔觀書散遺帙掇古窮至妙片言
苟會心掩卷忽而笑青蠅易相點白雪難同調本是踈散
人屢貽褊促謂雲天屬清朗林壑憶遊眺或時清風來閒
倚欄下嘯嚴光桐廬溪謝客臨海嶠功成謝人間從此一
投釣

尋陽紫極宮感秋作

何處聞秋聲翛翛北窓竹迴薄萬古心攬之不盈掬靜坐
觀衆妙浩然媚幽獨白雲南山來就我簷下宿嬾從唐生

决羞訪季主卜四十九年非一往不可復野情轉蕭散世道有翻覆陶令歸去來田家酒應熟

江上秋懷

餐霞卧舊壑散髮謝遠遊山蟬號枯桑始復知天秋朔雁別海裔越燕辭江樓颺颺風捲沙茫茫霧縈洲黃雲結暮色白水揚寒流惻愴心自悲潺湲淚難收蘅蘭方蕭瑟長歎令人愁

秋夕書懷

北風吹海鴈南度落寒聲感此瀟湘客悽其流浪情海懷結滄洲一作遠心霞想遊赤城始探蓬壺事旋覺天地輕澹然吟高秋閑卧瞻太清蘿月掩空幕松霜結前楹滅見息群動獵微窮至精桃花有源水可以保吾生

避地司空原言懷

南風昔不競豪聖思經綸劉琨與祖逖起舞鷄鳴晨雖有匡濟心終為樂禍人我則異於是潜光皖合版切水濱卜築司空原北將天柱鄰雪霽萬里月雲開九江春俟乎泰階平然後託微身傾家事金鼎年貌可長新所願得此道終然保清真弄景奔日馭攀星戲河津一隨王喬去長年玉天賓

南奔書懷

遙夜何漫漫空歌白石爛窳戚未匡齊陳平終佐漢攬槍上物銜切下初耕切彗星也掃河洛直割鴻溝半歷數方未遷雲雷屢多難天人乘旄鉞虎竹光藩翰侍筆黃金臺傳觴青玉案不因秋風起自有思歸歎主將動讒疑王師總離叛自來

白沙上鼓噪丹陽岸賓御如浮雲從風各消散舟中指可
搦城上骸爭爨草草出近關行行昧前筭南奔劇星火北
寇無涯畔顧之七寶鞭留連道邊翫太白夜食昂長虹日
中貫秦趙興天兵茫茫九州亂感遇明主恩頗高祖述言
過江擔流水志在清中原拔劍擊前柱悲歌難重論

荊州賊平臨洞庭言懷作

脩蛇橫洞庭吞象臨海島積骨成巴陵遺言聞楚老水窮
三苗國地窄三湘道歲晏天崢嶸時危人枯槁思歸阻喪
亂去國傷懷抱郢路方丘墟章華亦顛倒風悲猿嘯苦木
落鴻飛早日隱西赤沙月明東城草關河望已絕氛霧行
當掃長叫天可聞吾將問蒼昊

覽鏡書懷

得道無古今失道還衰老自笑鏡中人白髮如霜草捫心
空嘆息問影何枯槁桃李竟不言終成南山皓

江南有懷

青春幾何時黃鳥鳴不歇天涯失歸路江外老華髮心飛
秦塞雲影滯楚關月身世殊爛熳田園久蕪沒歲晏何所
從長歌謝金闕

詠物

聽蜀僧濬彈琴

蜀僧抱綠綺西下峨眉峯為我一揮手如聽萬壑松客心
洗流水餘響入霜鍾不覺碧山暮秋雲暗幾重

魯東門觀刈蒲

魯國寒事早初霜刈渚蒲揮鎌若轉月拂水生連珠此草

最可珍何必貴龍鬚織作玉床席欣承清夜娛羅衣能再
拂不畏素塵燕

詠隣女東窓海石榴

魯女東窓下海榴世所稀珊瑚映綠水未足比光輝清香
隨風發落日好鳥歸願為東南枝低舉拂羅衣無由共攀
折引領望金扉

南軒松

南軒有孤松柯葉自緜幕清風無閒時瀟灑終日夕陰生
古苔綠色染秋煙碧何當凌雲霄直上數千尺

求崔山人百丈崖瀑布圖

百丈素崖裂四山丹壁開龍潭中噴射晝夜生風雷但見
瀑泉落如激音叢小水也雲漢來聞君寫真圖島嶼備縈迴

石黛刷幽草曾青澤古苔幽緘儻相傳何必向天台

瑩禪師房觀山海圖

真僧閉精宇滅跡含達觀列障圖雲山攢峯入霄漢丹崖
森在目清晝疑捲幔蓬壺來軒窓瀛海入几案煙濤爭噴
薄島嶼相凌亂征帆飄空中瀑水灑天半崢嶸若可陟想
像徒盈嘆杳與真心冥遂諧靜者翫如登赤城裏揭步滄
洲畔即事能娛人從茲得消散

詠槿

園花笑芳年池草艷春色猶不如槿花嬋娟玉階側芬榮
何天促零落在瞬息豈若瓊樹枝終歲長翫迄力切

詠桂

世人種桃李皆在金張門攀折爭捷徑及此春風暄一朝

天霜下榮耀難久存安知南山桂綠葉垂芳根清陰亦可
託何惜樹君園

題詠

題隨州紫陽先生壁

神農好長生風俗久已成復聞紫陽客早署丹臺名喘息
食妙氣步虛吟真聲道與古仙合心將元化并樓疑出蓬
海鶴似飛玉京松雪窓外曉池水階下明忽耽笙歌樂頗
失軒冕情終願惠金液提携凌太清

題元丹丘山居

故人棲東山自愛丘壑美青春卧空林白日猶不起松風
清襟袖石潭洗心耳羨君無紛喧高枕碧霞裏

題元丹丘潁陽山居

并序

丹丘家于潁陽新卜別業其地北倚馬嶺連峯嵩丘
南瞻鹿臺極目汝海雲崑映鬱有佳致焉白從之遊
故有此作

仙遊度潁水訪隱同元君忽遺蒼生望獨與洪崖群卜地
初晦跡興言且成文却顧此山斷前瞻南嶺分遙通汝海
月不隔嵩丘雲之子合逸趣而我欽清芬舉跡倚松石談
笑迷朝曛益願狎青鳥拂衣棲江濱

題瓜洲新河餞族叔舍人賁

齊公鑿新河萬古流不絕豐功利生人天地同朽滅兩橋
對雙閣芳樹有行列愛此如甘棠誰云能攀折吳關倚此
固天險自茲設海水落斗門平湖見沙汭叶音女我行送
季父弭棹徒流悅楊花滿江來疑是龍山雪惜此林下興

李杜詩卷五
愴為山陽別瞻望清路塵歸來空寂滅

洗脚亭

白道向姑蘇洪亭臨道傍前有昔時井下有五丈床樵女
洗素足行人歇金裝西望白鳥洲蘆花似朝霜送君此時
去回首淚雙行

題金陵王處士水亭

王子耽玄言賢豪多在門好鵝尋道士愛竹嘯名園樹
老荒苑池光蕩華軒此堂見明月更憶陸平原掃地青
簞為余置金樽醉罷欲歸去花枝宿鳥喧何時復來此
得洗囂煩

題嵩山逸人元丹丘山居

并序

白久在廬霍元公近遊嵩山故交情深出處無間

信頻及許為主人欣然適會本意當冀長往不返
便舉家就之兼書共遊因有此贈

本家紫雲山道風未淪落沉懷丹丘志冲賞歸寂寞揭來
遊閩荒捫涉窮禹鑿黃緣泛潮海偃蹇涉廬霍憑雷躡
窓弄景照霞閣且欣登眺美頗愜隱淪諾三山曠幽期
岳聊所託故人憇嵩穎高義炳丹牋滅迹遺紛囂終言
峯壑自矜林湍好不羨市朝樂偶與真意并頓覺世情薄
爾能折芳桂吾亦採蘭若拙妻好乘鸞嬌女愛飛鶴提攜
訪神仙從此鍊金藥

改九子山為九華山聯句

并序

青陽縣南有九子山山高數千丈上有九峯如蓮華
按圖徵名無所依據太史公南遊畧而不書事絕古

老之口復闕名賢之紀雖靈異往復而賦詠罕聞予
乃削其舊號加以九華之目時訪道江漢憇於夏侯
迴之堂開簷岸幘坐眺松雪因與二三子聯句傳之
將來

妙有分二氣靈山開九華李層標過遲日半壁明朝霞高
積雪耀陰壑飛流歆陽崖韋權輿權一作權青瑩玉樹色縹緲羽
人家詩

雜詠

嘲魯儒

魯叟談五經白髮死章句問以經濟策茫如墜煙霧足著
遠遊履首戴方山中緩步從直道未行先啓塵秦家丞相
府不重褒衣人君非叔孫通與我本殊倫時事且未達歸

耕汶水濱

懼讒

二桃殺三士詎假劍如霜衆女妬娥眉雙花竟春芳魏妹
信鄭袖掩袂對懷王一惑巧言子朱顏成死傷行將泣團
扇戚戚愁人腸

嵩山採菖蒲者

神仙多古貌雙耳下垂肩嵩岳逢漢武疑是九疑仙我來
採菖蒲服食可延年言終忽不見滅影入雲煙喻帝竟莫
悟終歸茂陵田

金陵聽韓侍御吹笛

韓公吹玉笛侗儻留英音風吹繞鍾山萬壑皆龍吟王子
停鳳管師襄掩瑤琴餘韻渡江去天涯安可尋

白田馬上聞鶯

黃鸝啄紫椹五月鳴桑枝我行不記日誤作陽春時
蠶老客未歸白田已搔絲駟馬又前去捫心空自悲

雜詩

白日與明月晝夜尚不閒况爾悠悠人安得久世間傳聞
海水上乃有蓬萊山玉樹生綠葉靈仙每登攀一食駐玄
髮再食留紅顏吾欲從此去去之無時還

閨情

寄遠九首

三鳥別王母銜書來見過腸斷若剪絃其如愁思何遙知
玉窓裡纖手弄雲和奏曲有深意青松交女蘿寫水山井
中同泉豈殊波秦心與楚恨皎皎為誰多

青樓何所在乃在碧雲中寶鏡挂秋水羅衣輕春風新粧
坐落日悵望金屏空念此送短書願因雙飛鴻

本作一行書殷勤道相憶一行復一行滿紙情何極瑤臺
有黃鶴為報青樓人朱顏凋落盡白髮一何新自知未應
還離居經三春桃李今若為當窓發光彩若使香風飄留
與紅芳待

玉筋落春鏡坐愁湖陽水聞與陰麗華風煙接鄰里青春
已復過白日忽相催但恐荷花晚令人意已摧相思不惜
夢日夜向陽臺

遠憶巫山陽花明渌水暖躊躇未得往淚向南雲滿春風
復無情吹我夢魂斷不見眼中人天長音信短
陽臺隔楚水春草生黃河相思無日夜浩蕩若流波流波

向海去。欲見終無因。遙將一點淚。遠寄如花人。

妾在春陵東。君居漢江島。一日望花光。往來成白道。一作

採蘿蕪上一為雲雨別。此地生秋草。秋草秋蛾飛。相思愁

落輝。何由一相見。滅燭解羅衣。一本輝下云昔時携手去

玉筋點

長短春草綠。緣階如有情。卷施心獨苦。抽却死還生。覩物

知妾意。希君種後庭。閒時當採掇。念此莫相輕。

魯縞如玉霜。筆題月氏音岐國名書。寄書白鸚鵡。西海慰

離居。行數雖不多。字字有委曲。天末如見之。開緘淚相續。

淚盡恨轉深。千里同此心。相思千萬里。一書直百金。

代贈遠

妾本洛陽人。狂夫幽燕客。渴飲易水波。猶來多感激。胡馬

西北馳。香駿搖綠絲。鳴鞭從此去。逐虜蕩邊陲。昔去有好

言。不言久離別。燕支多美女。走馬輕風雪。見此不記人。恩

情雲雨絕。啼流王筋盡。坐恨金閨切。織錦作短書。腸隨回

紋結。相思欲有寄。恐君不見察。焚之揚其灰。手跡自此滅。

閨情

流水去絕國。浮雲辭故關。水或戀前浦。雲猶歸舊山。恨君

流沙去。棄妾漁陽間。玉筋夜垂流。雙雙落朱顏。黃鳥坐相

悲。綠楊誰更攀。織錦心草草。挑燈淚斑斑。窺鏡不自識。况

乃狂夫還。

代別情人

水清本不動。桃花發岸傍。桃花弄水色。波蕩搖春光。我悅

子容艷。子傾我文章。風吹綠葉去。曲度紫鴛鴦。昔作一水

魚今成兩枝鳥哀哀長鷄鳴夜夜達五曉起折相思樹歸
贈知寸心覆水不可收行雲難重尋天涯有度鳥莫絕瑤
華音

代秋情

幾日相別離門前生穠力與切自葵寒蟬聒梧桐日夕長
鳴悲白露濕螢火清霜零兔絲空掩紫羅袂一作空閨長
啼無盡時

湖邊採蓮婦

小姑織白紵未解將人語大嫂採芙蓉溪湖千萬重長兄
行不在莫使外人逢願學秋胡婦真心比古松

學古思邊

銜悲上隴首腸斷不見君流水若有情幽哀從此分蒼茫

愁邊色惆悵落日曛山外接遠天天際復有雲白鴈從中
來飛鳴苦難聞足繫一書札寄言難離群離群心斷絕十
見花成雪胡地無春輝征人行不歸相思杳如夢珠淚濕
羅衣

折荷有贈

與前擬古詩內等
十一首數字不同

涉江翫秋水愛此紅蕖鮮攀荷弄其珠蕩漾不成圓佳人
綵雲裡欲贈隔遠天相思無因見悵望涼風前

代美人愁鏡

明明金鵲鏡了了玉臺前拂拭皎冰月光輝何清圓紅顏
老昨日白髮多去年鉛粉坐相誤照來空凄然

長信宮

月皎昭陽殿霜清長信宮天行乘玉輦飛燕與君同更有

歡娛處承恩樂未窮誰憐團扇妾獨坐怨秋風

秋浦寄內

我今尋陽去辭家千里餘結荷倦水宿却寄大雷書雖不同辛苦愴離各自居我自入秋浦三年北信踈紅顏愁落日白髮不能除有客自梁苑手携五色魚開魚得錦字歸問我何如江山雖道阻意合不為殊

自代內贈

寶刀裁流水無有斷絕時妾意逐君行纏綿亦如之別來門前草秋巷春轉碧掃盡還更生萋萋滿行跡鳴鳳始何得雄鷲雌各飛遊雲落何山一往不見歸估客發大樓知君在秋浦梁苑空錦衾陽臺夢行雨妾家三作相失勢去西秦猶有舊歌管淒清聞四隣曲度入紫雲啼無眼中人

秋浦感主人歸燕寄內

妾似井底桃開花向誰笑君如天上月不肯一回照窺鏡不自識別多憔悴深安得秦吉了為人道寸心

送內尋廬山女道士李騰空 二首

君尋騰空子應到碧山家水春雲母碓風掃石楠花若戀幽居好相邀弄紫霞

多君相門女學道愛神仙素手掬青靄羅衣曳紫煙一往屏風疊乘鸞著玉鞭

在尋陽非所寄內

聞難知慟哭行啼入府中多君同蔡琰流淚請曹公知登
吳章嶺昔與死無分崎嶇行石道外折入青雲相見若悲
歎哀聲那得聞

哀傷

自溧水道哭王炎

白楊雙行行白馬悲路傍晨興見曉月更似發雲陽溧水
通吳關逝川去未央故人萬化盡閉骨茆山岡天上墜玉
棺泉中掩龍章名飛日月上義與風雲翔逸氣竟莫展英
圖俄天傷楚國一老人來嗟龔騰勝亡有言不可道雲泣
惜蘭芳

李杜詩集卷之五

李集

程